

欽定全唐文

欽定全唐文卷六百六十五目錄

白居易

十

與茂昭書

與昭義節度親事將士等書

與恒州節度下將士書

與吐蕃宰相鉢闡布敕書

與吐蕃宰相尚綺心兒等書

與新羅王金重熙等書

與驃國王雍羌書

與南詔清平官書

與回鶻可汗書

與金陵立功將士等敕書

答李遜等謝恩令附入屬籍表

批百寮嚴綬等賀御撰屏風表

答杜兼謝授河南尹表

答段祐等賀冊皇太子禮畢表

答李詞賀處分王士則等德音表

批宰相賀赦王承宗表

答王承宗謝洗雪及復官爵表

答高郢請致仕第二表

答裴垍讓中書侍郎平章事表

答劉總謝檢校工部尚書范陽節度使表

答任迪簡讓易定節度使表

答裴垍讓宰相第二表

答裴垍謝銀青光祿大夫兵部尚書表

答文武百寮嚴綬等賀御製新譯大乘本生心地

觀經序表

答孟簡蕭俛等賀御製新譯大乘本生心地觀經

序狀

答元應授岳鄂觀察使謝上表

答李鄘授淮南節度使謝上表

答元義請上尊號表

答薛平賀生擒李錡表

答杜黃裳請上尊號表

答李扞等謝許上尊號表

答馮伉請上尊號表

答長安萬年兩縣百姓耆壽等謝許上尊號表

答元素謝上表

答韓皋請上尊號表

答馮伉謝許上尊號表

答百寮謝許追遊集宴表

答李扞謝許遊宴表

答薛平謝授浙東觀察使表

答朱仕明賀冊尊號及恩赦表

答劉濟詔

答盧虔謝賜男從史德政碑文并移貫屬京兆表

答杜佑謝男師損除工部郎中表

答王鍔陳讓淮南節度使表

答韓宏讓同平章事表

答韓宏再讓平章事表

答杜兼謝上河南少尹知府事表

答王鍔賀賑恤江淮德音表

答宰相杜佑等賀德音表

答宗正卿李詞等賀德音表

答將軍方元蕩等賀德音表

答宰相杜佑等賀德音表

答京兆府二十四縣耆壽謝賑貸表

批河中進嘉禾圖表

欽定全唐文卷六百六十五

白居易

十

與茂昭書

勅茂昭王日興至省所奏今月十八日大破賊眾一萬七  
千人并擒斬收獲訖者具悉卿親率勁兵誓平妖寇竭股  
肱之力中有奇謀勵父子之軍前無強敵故能深入賊境  
大破兇徒殺傷既多俘獲亦廣具詳奏報備見忠勞眷屬  
之懷發於寤嘆將士等各懷勇烈同忿寇讎激於眾心致  
此殊效况荷戈於炎暑之際奮身於鋒刃之間永念於茲

金史卷之三  
未嘗暫忘故令宣慰宜并悉之

與昭義節度親事將士等書

勅昭義軍節度下親事將士等盧從史受恩至重負國至多衆所不容追令赴闕朕以誤曾任使貴全始終今則止於貶官此蓋曲從寬典卿等抱忠懷義朕所素知頃以諸營同事從史三軍一體俱是王臣既不相干又能自効朕方優賞以酬功勲何至不安有此疑懼必恐從史已追之後元陽未到之間卿等當營乍無主將或被外人扇誘令眾意憂疑勢使之然事非獲已朕雖在此遠見軍情料卿

本心必無此意况元陽勤儉恤下寬厚愛人久在河陽甚  
近澤潞元陽臧否卿等合諳以卿忠義之軍故擇仁賢爲  
帥已有詔示宣諭元陽若到行營一無所間乃至將士家  
口亦令優卹安存卿復何憂必得其所況昭義將士艱難  
以來保守忠貞未嘗虧失天下稱嘆卿亦自知又卿父母  
妻兒家田墳墓一物以上竝在潞州頃刻之間豈忍便棄  
朕之此語卿宜細思各相勉諭同保忠順計元陽已合到  
彼卿等便聽元陽指麾想卿等心必副朕意故令宣慰竝  
宜知悉

與恒州節度下將士書

勅成德軍節度下將士等朕以王者之道與物無私若違  
命執迷則罔有容捨若知非改悔則無不舍宏不窮無告  
之人不塞自新之路頃屬姦臣從史謀構異端致使恒陽  
隔於恩外六郡之地皆廢農桑三軍之人竝懼鋒鏑每一  
念至中心惻然今卿等繼獻表章遠輸誠款省承宗之勤  
懇艱阻其情思武俊之功勞不能無念况事因詐誤而理  
可哀矜今已降制書各從洗雪承宗仍復舊官爵充恒冀  
深趙德棣六州觀察使成德軍節度使將士等官爵實封

並宜仍舊待之如初卿等各宜協力同心知恩感德共保  
終始稱朕意焉故令宣慰宜竝知悉

與吐蕃宰相鉢闡布勅書

勅吐蕃宰相沙門鉢闡布論與勃藏至省表及進奉具悉  
卿器識通明藻行精潔以爲眞實合性忠信立誠故能輔  
贊大蕃叶和上國宏清淨之教思安邊陲廣慈悲之心令  
息兵甲旣表卿之遠畧亦得國之良圖况朕與彼蕃代爲  
甥舅兩推誠信共保始終覽卿奏章遠叶朕意披閱嘉嘆  
至於再三所議割還安樂秦原等三州事宜已具前書非

不周細及省來表似未指明將期事無後難必在言有先  
定今信使往來無壅疆場彼此不侵雖未申以會盟亦足  
稱爲和好必欲復修信誓卽須重畫封疆雖兩國盟約之  
言積年未定但三州交割之後剋日可期朕之衷情卿之  
志願俱在於此豈不勉歟又緣自議三州已來此亦未發  
專使今者贊普來意欲以再審此言故遣信臣往諭誠意  
卽不假別使更到東軍此使已後應緣盟約之事如其間  
節目未盡更要商量卿但與鳳翔節度使計會此已處分  
令其奏聞則道路非遙往來甚易頗爲便近亦冀速成更

待要約之言皆已指定封疆之事保無改移卽蕃漢俱遣重臣然後各將成命事關久遠理貴分明想卿通才當稱朕意曩者鄭叔矩路泌因平涼盟會沒落蕃中比知叔矩已亡路泌見在念茲存沒每用惻然今旣約以通和路泌合令歸國叔矩體骨亦合送還表明信誠兼亦在此其論與勃藏等尋到鳳翔舊例未進表函節度不敢聞奏自取停滯非此稽畱昨者方進表函旋令召對今便發遣更不遲迴仍令與祠部郎中兼御史中丞徐復及中使劉文璨等同往其餘事宜已具與贊普書內卿宜審於謀議速副

誠懷兼有少信物賜卿具如別錄至宜領也冬寒卿比平安好遣書指不多及

與吐蕃宰相尚綺心兒等書

勅吐蕃宰相尚綺心兒等諭思諾悉至省表并進奉具悉卿等才器特茂識畧甚明仗義立身資忠事主上佐贊普下康黎元以尋盟納款爲謀繼好息人爲請是卿上策叶朕中心每覽表章輒用嘉嘆朕與彼蕃國代爲舅甥日結恩信自論盟會頗厯歲時常欲速成以爲永好雖誠明之內彼此無疑而言約之間往復未盡今故畧收來意重示

所懷想卿通明當所鑒悉河隴之地國家舊封論州郡則其數頗多計年歲則沿來甚近既通和好悉合歸還今者捨而不言豈是無心愛惜但務早成盟約所以唯言三州則沒於彼者甚多歸於此者至少猶合推於禮讓豈假形於言詞來表云此三州非創侵襲不可割屬大唐來且此本不屬蕃豈非侵襲所得今是却歸舊管何引割屬爲詞去年論與勃藏來卽云覆取進旨贊普便請爲定今兩般使至又云比之小務未合首而論之前後既有異同信使徒煩來去雖欲速爲盟會其如無所適從靜言二三固不

在此若論和好卽今各無侵軼已同一家若議修盟卽須重定封疆先歸三郡若三郡未復兩界未分卽是未定封疆憑何以爲要約彼若吝惜小事輕易遠圖未能修盟且務通好至於信使一往一來但令疎數得中足表情意不絕彼有要事卽令使來此有要事亦令使往若封境之上小小事意但令邊頭節度兩處計會商量則勞費之間彼此省便前般蕃使論悉吉贊至緣盟約事大須審商量未及發遣後使雖是兩般所論只緣一事故令相待今遣同歸在於日時亦未淹久所送鄭叔矩及路泌神柩及男女

等竝已到此良用惻然厚贈遠歸深嘉來意其劉成師原  
非劉闢子姪本是成都郡人已令送還本貫其餘事目竝  
在贊普書中卿等宜審參量以副朕意使迴之日可備奏  
聞今遣兼御史中丞李鋗及中使與迴使同往各有少信  
物具如別數至宜領之秋涼卿等各得平安好遺書指不  
多言

與新羅王金重熙等書

勅新羅王金重熙金獻章及僧沖虛等至省表兼進獻及  
進功德并陳謝者具悉卿一方貴族累葉雄才仗忠孝以

立身資信義而爲國代承爵命日慕華風師旅叶和邊疆  
寧泰况又時修職貢歲奉表章進獻精珍忠勤竝至功德  
成就恭敬彌彰載覽謝陳益用嘉嘆滄波萬里雖隔於海  
東丹憮一心每馳於闕下以茲嘉尚常屬寢興勉宏始終  
用副朕意今遣金獻章等歸國并有少信物具如別錄卿  
母及妃并副王宰相已下各有賜物至宜領之冬寒卿比  
平安好卿母比得和宜官吏僧道將士百姓等各加存問  
遣書指不多及

與驃國王雍羌書

勅驃國王雍羌卿性宏毅勇代濟貞良訓撫師徒鎮寧邦  
部欽承王化思奉朝章得睦隣之善謀秉事大之明義又  
令愛子遠赴闕庭萬里納忠一心稟命誠信彌著嘉想益  
深今授卿檢校太常卿并卿男舒難陀那及元佐摩訶思  
那等二人亦各授官誥往至宜領之此所以表卿勲勤申  
朕恩禮敬受新命永爲外臣勉宏令圖以副遐矚今有少  
信物具如別錄想宜知悉也冬寒卿比平安官吏百姓等  
竝存問之遣書指不多及

與南詔清平官書

勅南詔清平官段諾突李附覽饗何棟尹輔首段谷普李異傍鄭蠻利等段史倚至知異牟尋喪逝朕以義重君臣情深軫悼卿等哀慕所切當何可任又知閣勸繼業撫人輸誠奉教蒸蒸咸乂封部獲安皆是卿等同竭忠謀佐成休績永言及此嘉慰良深勉終令圖以嗣遐矚今遣諫議大夫兼御史中丞段平仲持節冊命閣勸想當悉之卿等各有少信物具如別錄至宜領也春寒卿等各得平安好遣書指不多及

與回鶻可汗書

皇帝敬問回鶻可汗夏熱想比佳適可汗有雄武之姿英  
果之畧統制諸部君長一方纂承前修繼守舊好故得邑  
落蕃盛士馬精強連挫西戎永藩中夏况嚮風之義每勤  
於朝聘事大之敬常見於表章動皆由衷言必合禮朕所  
以深嘉忠款追想風規至於寢興不忘嘆矚勉宏令德用  
副誠懷達覽將軍等至省表其馬數共六千五百匹據所  
到印納馬都二萬匹都計馬價絹五十萬匹緣近歲以來  
或有水旱軍國之用不免闕供今數內且方圓支二十五  
萬匹分付達覽將軍便令歸國仍遣中使送至界首雖都

數未得盡足然來使且免稽畱貴副所須當悉此意頃者所約馬數蓋欲事可久長何者付絹少則彼意不充納馬多則此力致歉馬數漸廣則欠價漸多以斯商量宜有定約彼此爲便理甚昭然况與可汗禮在往來義存終始親隣既通於累代恩好益厚於往時所以萬里推誠期於一言見信遠思明智固體朕心其東都太原置寺此令人勾當事緣功德理合精嚴又有彼國師僧不必更勞人檢校其見燃拓勿施鄖達於等今竝放歸所令帝德將軍安慶雲供養師僧請住外宅又令骨都祿將軍充檢校功德使

其安立請隨班次放歸本國者竝依來奏想宜知悉今賜少物具如別錄內外宰相及判官摩尼師等竝各有賜物至宜准數分付內外宰相官吏僧等竝存問之遣書指不多及

與金陵立功將士等勅書

勅浙西立功將士等朕自臨寰宇已再逾年以忠恕牧萬人以恩信馭百辟動必思於卹隱靜無忘於泣辜庶乎馴致小康寢興大道也李錡因緣屬籍踐厯官常包藏禍心素懷梟獍之性彰露凶德忽發豺狼之聲朕念以宗枝務

於容貸諭以迷復卒無悛心而乃保界重江竊弄凶器抗拒朝命驅脅師人背德欺天亂常干紀蜂薑之毒流於郡縣犬彘之行肆於閨門惡稔禍盈親離眾叛人神共棄天地不容卿等忠憤闡彰義勇潛發變疾風雨謀先鬼神中推赤心前蹈白刃率其脅力死命於軍前擒其兇魁生致於闕下廓千里之沴氣濟一方之生人誠感君親義激臣子臨危見不奪之節因事立非常之功予嘉乃誠一念三嘆至於圖勞懋賞詢事策勲各有等差續當處分故先宣慰宜竝悉之冬寒卿等各得平安好遣書指不多及

答李遜等謝恩令附入屬籍表

卿先父頃逢多難嘗立大功每想忠勞豈忘存歿念先臣之績雖書名於太常推同姓之恩更附籍於宗正俾增榮於一族兼延寵於九原卿等或詩禮承家或弓裘奉業咸鍾新命慶屬本枝省所謝陳深嘉誠懇

批李夷簡賀御撰君臣事迹屏風表

朕思求理化親閲典墳至於去邪納諫之規勤政慎兵之誠取而作鑒書以爲屏與其散在圖書心存而景慕不若列之繪素目觀而躬行庶將爲後事之師不獨觀古人之

象卿詞彰恭順義見忠規省覽再三深叶朕意所賀知

批百寮嚴綬等賀御撰屏風表

朕烈祖太宗以古爲鏡用輔明聖實臻理平垂作孫謀每  
懼乎失墜取爲殷鑒遂飾之丹青至若明君直臣前言往  
事森然在目如見其人論列是非旣庶幾爲座隅之誠發  
揮獻納亦足以開臣下之心况卿等職在儀刑政當補察  
各勤所任共副茲懷所賀知

答杜兼謝授河南尹表

卿文通吏道學達政源凡厯官常輒聞績効觀能以授俾

亞理於三川見可而遷宜專臨其一府盡委封畿之政仍兼運漕之權歲時之間佞性勤効勉恭爾職重副予懷所謝知

答段祐等賀冊皇太子禮畢表

朕祇膺統序恭守典常爰推至公乃命長子使主國鬯用貞邦家冊畢禮成良增感慶卿等各司軍衛同奉表章備見忠誠益深嘉嘆所賀知

答李詞賀處分王士則等德音表

朕臨馭天下以懲勸爲先有惡必誅無功不念顧承宗之

罪誠合討除思武俊之勲宜令嗣襲况墳墓禁其翦伐將  
校許以歸降庶明用師蓋非獲已卿職修卿寺誠奉本枝  
省茲賀章備見忠盡

批宰相賀赦王承宗表

先臣武俊功不可忘後嗣承宗過而能改朕所以捨其罪  
悔議以勲親垂宥過之恩尚宜及爾十代引泣辜之責誠  
合在乎一人與其驥武而取威不若匿瑕而務德卿等重  
居台輔密贊謀猷發於衷誠有此稱賀省閱章奏嘉嘆久  
之

答王承宗謝洗雪及復官爵表

帝者之道蕩然無私唯推赤心以牧黔首故一夫不獲若納之於隍一物歸誠則容之如地况卿家聯懿戚寵自先朝祖立茂功賞延後嗣因人詐誤不汝疵瑕滌以恩波煦之寵澤撫舊封而廉察六郡進新律而統制三軍蕩穢加恩何以過此及覩來表乃見深誠言必由衷事皆知感承家襲慶誓繼力於前修補過酬恩願指期於報効永言爾志甚叶朕懷勉思始終用副眷囑所謝知

答高郢請致仕第二表

卿有忠貞之節立於險中有清重之名鎮於朝右而能始終有道進退有常援禮引年遺榮致政人鮮知之卿獨能行不惟振起古風亦足激揚時俗於卿則確然難奪在朕則情豈易忘誠鑒乃懷未允來表

答裴垍讓中書侍郎平章事表

卿自登台輔每竭忠貞一身秉彝百度惟序致君盡力久積股肱之勤憂國勞心微生腠理之疾暫從休告遽獻表章所陳雖是卿心所請殊非朕意宜加調攝速就平和以副虛懷無爲固讓

答劉總謝檢校工部尚書范陽節度使表

卿幼承義訓長有令聞能遵忠孝之風不墜弓裘之業朕所以命加異等寵冠常倫特授雙旌超登八座豈惟延賞亦在任能將懋前修勉申後効載省章疏深鑒誠懷所謝知

答任迪簡讓易定節度使表

卿修文立身經武致用每誓心於忠勇常濟事以智謀自副戎車已屬時望及分節鉞果愜軍情況武義之師輸忠仗順所期撫慰以就輯寧何至撝謙有茲陳讓所進官告

今却賜卿宜體朕懷卽斷來表

答裴垍讓宰相第二表

卿疾病以來表疏相繼雖辭乞之誠頗切而注望之意方深所以來章久而未報然念卿勤懇之請至於再三若心不甚安卽疾難速愈是用輒樞劇之務加崇重之官稍遂優閒佇期痊復勉從爾志深抑予懷

答裴垍謝銀青光祿大夫兵部尚書表

卿自居鈞軸日獻謀猷戴君常竭其股肱憂國每形於顏色及嬰疾病益不遑安未踰四旬以至三讓摶謙秉易退

之道堅懇陳難奪之詞遂抑朕心俯從卿請而七命印綬  
五兵尚書官秩甚崇事務稍簡就以優養冀乎和平載省  
表章深見誠意

答文武百寮嚴綬等賀御製新譯大乘本生心地  
觀經序表

朕勤求道本廣挹教源以真如不二之宗助清淨得一之  
化况斯經典時爲大乘名理精微翻譯成就雖契心則離  
於文字而得意亦假於筌蹄庶使發揮因爲述序卿等精  
通外學懇竭忠誠引經贊揚奉表稱賀再三省覽嘉嘆久

之

答孟簡蕭俛等賀御製新譯大乘本生心地觀經

序狀

大僊經典最上法乘來自西方闕於中禁將期利益必在  
闡揚遂命僧徒譯其句偈兼詔卿等潤以文言昨因披尋  
深得真諦悟本生不滅之義證心地無相之宗方勤護持  
聊著序引永言述作猶愧聖明卿等賀陳良深嘉尚

答元應授岳鄂觀察使謝上表

夏口重鎮屬在時賢非明肅不能理其軍非簡儉不能阜

其俗以卿有仁厚之質謇直之風累踐班行皆著名節遂  
輶中憲往臨外藩知已下車深慰人望佞性報政用副朕  
懷所謝知

答李鄘授淮南節度使謝上表

卿抱兼人之才秉徇公之節每登要職悉著能名若刃發  
硎投而不滯如玉在佩動必有聲朕以距淮而南人物繁  
會非廉明何以貞師察俗非簡惠何以通商綏農前勞既  
彰後効何遠載省來表知已下車勉副虛懷佞性觀新政所  
謝知

答元義請上尊號表

朕自君臨幸逢休泰時歲豐稔兜醜殄夷此皆宗社降靈忠賢宣力顧惟寡德敢受鴻名卿中發懇誠上尊美號雖屬人望難負天功宜悉所懷勿固爲請

答薛平賀生擒李錡表

朕自嗣耿光每多惕厲念必先於除害志無忘於安人李錡大負國恩自貽天罰師徒未動於疆場父子俱肆於市朝信上天之禍淫與率土而同慶省視來表深鑒乃誠所

賀知

答杜黃裳請上尊號表

朕以薄德嗣守丕圖不敢荒寧以宏理道幸屬歲時豐稔  
兇寇梟夷風雨不愆禮圜丘而報本雷霆未震疊太社而  
服刑斯皆十聖降靈幽贊寡昧百辟叶德馴致和平永惟  
宏名實懼虛美卿上稽祖訓下酌羣情陳獻表章請加徽  
號暨於王公卿士降及耆艾繙黃咸一乃心各三其請朕  
嘗以宰元化者曲成於物法天道者從欲於人雖恤隱泣  
辜未臻三五之化而樂推欣戴難違億兆之心德非稱焉  
讓不獲已勉從所請深愧於懷

答李扞等謝許上尊號表

朕自臨萬邦僅經三載位雖托於人上化未洽於域中永念眇身敢當大號卿等義深宗室忠盡君親一其情誠三有陳獻迫以人望厭於天心遂抑所懷勉從其請固辭而事非獲已撫德而何以堪之再省謝章彌增惕厲

答馮伉請上尊號表

朕統承大寶時屬小康伐謀而吳蜀克清示信而華夷有截斯皆宗社垂祐天地降和非予冲人所能馴致卿上稽十聖之訓下酌萬人之心以爲不讓強名未傷於體道屈

已循物何爽於至公遂抑素懷俯從眾望雖鴻名未稱每  
勞踰地之心而人欲不從卽爽法天之德勉依勤請良用  
愧懷

答長安萬年兩縣百姓耆壽等謝許上尊號表

朕每念雍熙慙未及於億兆永言徽號讓已至於二三而  
文武具寮緇黃庶老懇陳誠款明引訓謨開予以天地無  
私之心起予以聖宗不易之訓以大道者無求於物物尊  
而不辭至公者非欲其名名立而不讓迫於固然之禮不  
不得已而許之卿等誠至感通義深欣戴再煩陳謝益用愧

懷

答元素謝上表

卿用兼文武識合變通輶綱領於中朝授麾幢於外閩吏能足以惠物將畧足以董戎人望所歸予心是賴知卿已到本鎮當慰疲人深藉撫綏之方以安凋弊之俗日期報政歲望成功勉勤所圖用副朕意

答韓皋請上尊號表

銷沴致和幸逢昌運加名建號豈稱眇身而文武具寮黎獻庶老引古今之明訓陳億兆之懇誠謂德有所歸謳歌

不可以苟讓謂功有所獻徽號不可以固辭遂抑中懷俯從眾望庶增修乎茂實冀克副於鴻名卿發誠自中歸美於上勉依所請彌愧於心

答馮伉謝許上尊號表

朕以眇身嗣於丕業心雖勞於惕厲化未及於雍熙永惟強名實懼虛美上自一二元老下及億兆黎人大洽詢謀明徵典訓增予以巍巍之號感予以禹禹之誠既迫所懷俯從其請卿義深奉上志切戴君再省謝陳彌增愧惕

答百寮謝許追遊集宴表

在昔哲王居於人上推其憂樂與眾共之頃屬三兇薦興  
二載連獲凡百有位咸一其心誠念嘉謀共致昭泰今四  
表無事三農有年想與羣情同其具慶是宜削苛察之前  
弊煦寬裕之新恩仁及下而啟迪歡心澤先奏而導迎和  
氣昨逢多故主憂且使臣勞今致小康上安則宜下樂庶  
欲解人之懼粗申推已之恩豈曰殊私煩於陳謝

答李扞謝許遊宴表

朕自御萬方僅經三載運逢休泰俗漸和平當朝野無虞  
之時見君臣相遇之樂是故去滋彰之化宏優貸之恩近

自宗親下及士庶賜其宴衍遂以優游蓋以已之所安思  
與人之共樂雖夕惕而若厲每戒志於無荒賜春遊以發  
生宜助時而有慶卿等榮崇宗寺恩重本枝省所謝陳彌  
嘉誠懇

答薛平謝授浙東觀察使表

卿久踐吏途累聞能政及居藩鎮尤見忠勤訓導而羣黎  
向方廉察而列郡承式實嘉乃績每簡予心宜遷雄薦之  
藩以廣循良之化勉於爲理副朕所懷所謝知

答朱仕明賀冊尊號及恩赦表

朕以寡德嗣承睿圖俯從眾誠勉受鴻稱慶之大者豈在  
予一人推而廣之宜及爾萬姓爰因受冊之禮遂施作解  
之恩俾與羣生同斯大慶卿盡忠訓旅推美奉君省茲賀  
陳深見誠至

答劉濟詔

勅劉濟省所奏茂昭送卿管內百姓殷進能等七人奏前  
後事由具悉卿爲國大臣與君同體寬而得眾忠以忘身  
每循公而滅私能虛懷以容物與茂昭疆場之事小有違  
言曲直是非朕已明辨卿外崇藩翰內贊謨猷念屈已以

爲心或難容忍思戴君而是力宜務叶和勉卿寬裕之懷  
助朕含宏之化想宜知悉

答盧虔謝賜男從史德政碑文并移貫屬京兆表

卿男從史爲國重臣自領大藩厥有成績公忠茂著政理  
殊尤勤石所以表勲賜文所以褒德惟功是念有善必旌  
是國舊章非予私渥昨又請移卿貫願隸京邑家聲益振  
臣節逾章雖清望標門崇冠山東之族而丹心戀闕恥爲  
關外之人載省懇誠彌深嘉嘆所謝知

答杜佑謝男師損除工部郎中表

金匱全集卷之二十一  
卿道贊謨猷功成輔弼師損克承訓義雅有令名豈惟賞延兼以能選班行久次頗積功勤郎署積遷未爲渥澤省茲章奏深見懇誠所謝知

答王鐸陳讓淮南節度使表

卿自領大藩累彰殊効惠安百姓表正一方雖戀闕誠深然殷邦寄切旣執圭而肆覲宜返旆而勞旋况淮海要衝旌旄重任永言共理已有成功方注意於撫綏何憑誠而陳讓難允來請宜體所懷

答韓宏讓同平章事表

致理之道審官爲先以卿有文武之才故授卿以將相之任所冀外爲藩翰張爪牙之威內贊謨猷宣股肱之力僉諧允屬眾望攸歸方注意於安危何執謙而陳讓所進官誥今却賜卿無或再辭卽斷來表

答韓宏再讓平章事表

將相兼委實難其人非其德不可謬承當其才不在懇讓朕非虛授卿勿固辭宜斷來章卽奉成命已具前詔當體朕懷

答杜兼謝上河南少尹知府事表

三川封畿實重其任貳職綱紀亦難其人卿素懷器能累  
著聲績亞理以明慎選專領以展長才知已下車當親綏  
撫併聞報政用副憂勤所謝知

答王鐸賀賑恤江淮德音表

水旱流行江淮艱食朕明申詔旨親遣使臣蠲其逋租賑  
以公廩爰興利物之利用表憂人之憂庶俾疲氓均霑惠  
澤卿克勤乃職共理爲心省茲賀陳深見誠意

答宰相杜佑等賀德音表

古先聖王托於人上與百姓同其欲與天下共其憂唯推

是心可底於道朕臨御萬國迨茲五年惕厲之懷雖勤於夙夜愆伏之候猶害於歲時思革弊以救災在濟人而損已是用欽刑緩死責已卹貧罷郡國之貢珍省宮廄之煩費延春令而布仁行惠先南風而解懶阜財庶憑歡心以召和氣卿等或匪躬獻替或悉力弼諧啟沃之間已申霖雨之用變理之際佇見陰陽之和各宜勉之以輔予理所

賀知

答宗正卿李詞等賀德音表

朕統承鴻緒子育蒼生累歲有秋今春不雨在陰陽之數

雖有盈虛爲父子之心敢忘惻隱俾除人弊以盪歲災卿等任重宗卿恩連屬籍省茲陳賀深見忠誠

答將軍方元蕩等賀德音表

朕以時陽舛候春澤愆期思備旱之方無如貶省務動天之德莫若精誠是以修己卹人去煩節用冀答天戒以致時和卿志竭邦家職修軍衛省茲表章深用嘉之所賀知  
答宰相杜佑等賀德音表

朕以春候發生歲功資始順陽和而布政賑貧乏而勸農載念罪人因除弊事隨其所利施以爲恩富庶之端實漸

於此卿等義敦宗戚誠竭君親省茲賀陳用增嘉歎

答京兆府二十四縣耆壽謝賑貸表

朕勤求人隱慎卹農功念播植之時必資首種慮懸磬之日多乏見糧將使公私宜從斂散卿等名登庶老業守先疇各勉農人以副朕意所謝知

批河中進嘉禾圖表

上天降休下土効祉將表豐年之兆故生同穎之祥顧慙寡德受此嘉瑞披圖省表閱視久之卿發誠自中歸美於上亦宜勉勤匡贊馴致雍熙庶洽升平之風以叶和同之

慶所賀知

欽定全唐文卷六百六十六目錄

新文藝出版社藏書

白居易 十一

冊新回鶻可汗文

冊回鶻可汗加號文

贈劉總太尉冊文

爲宰相賀赦表

爲宰相請上尊號第二表

爲宰相讓官表

賀平淄青表

賀上尊號後大赦天下表

爲宰相賀兩表

爲宰相賀殺賊表

賀雲生不見日蝕表

爲崔相陳情表

忠州刺史謝上表

杭州刺史謝上表

爲宰相謝官表

蘇州刺史謝上表

元和南省請上尊號表

第三表

第四表

論請不用奸臣表

諫詔吐突承璀率師出討王承宗疏

再言承璀疏

河朔復亂合諸道兵討無功賊取弓高絕糧道深  
州圍益急因上言

欽定全唐文卷六百六十六

白居易十一

冊新回鶻可汗文

維長慶元年歲次辛丑四月庚寅朔二十一日庚戌皇帝  
若曰唐有天下垂二百載列聖垂拱八荒卽敘舟車之所  
及日月之所照威綏仁董罔不嚮化惟北之氣積厚而靈  
靈發象生生爲豪傑義信武烈代爲名王南西東方亦有  
君長較雄鬪智莫之與京國朝已來寢漬風澤或効功伐  
或申婚媾同和協比以訖於今今朕不得祇嗣大統推義

布信以初爲常矧乎柔遠申恩睦鄰展禮茲爲舊典垂自  
祖宗虔奉恭行安敢失墜咨爾九姓回鶻君登里羅羽錄  
歿密施匱主錄毗伽可汗地生奇特天賜勇智英姿所蒞  
雄畧所加諸戎雜虜愛畏柔服風靡山立清寧一方宜人  
有土受天百祿時推代嗣實來告予曰予一人實隣冊命  
是用遣使朝議大夫檢校左散騎常侍兼少府監御史大  
夫雲騎尉賜紫金魚袋裴通副使朝議大夫守少府少監  
兼御史中丞襲魏國公食邑三千戶賜紫金魚袋賈疇等  
持節備物冊爲登里羅羽錄沒密施匱主錄毗伽可汗於

戲善必有鄰德無不答此崇恩禮則彼竭信誠克保大義  
永藩中夏昭昭天地實聞斯言

冊回鶻可汗加號文

維長慶元年歲次辛丑某月朔某日皇帝若曰北方之強  
代有君長作殿元朔賓於皇唐粵我祖宗錫乃婚媾五聖  
六紀二邦一家此無北伐之師彼無南牧之馬兵匝鋒刃  
使長子孫叶德保和以至今日咨爾回鶻君登里羅羽錄  
歿密施勣主錄毗伽可汗義智忠肅武決勇健天之所授  
時而後生故東漸海夷西亘山狄惠寧威制鱗帖草偃聲

有聞於天下氣無敵於荒外而能事大圖遠納忠貢誠請  
仍舊姻誓嗣前好朕惟睦鄰是務柔遠爲心旣降和親之  
命遂申飾配之禮禮物大備寵章有加喜動陰山光增昂  
宿夫以回鶻雄傑如彼慶榮若此雖自貴曰天驕子未稱  
其盛雖自尊曰天可汗未稱其美宜賜嘉號以大誇將來  
今遣使某官某副使某官某等持節加冊爲信義勇智雄  
重貴壽天親可汗於戲釐降展親大德也進冊加號大名  
也宜乎思大德稱大名懋哉始終欽若唐之休命

贈劉總太尉冊文

維長慶元年四月某日皇帝若曰朕聞古有履忠仗順生而大有爲者又有功成身退歿而永不朽者非正氣令德間生挺出則高名大節孰能兼之哉故天平軍節度使檢校司徒兼侍中楚國公劉總降自天和生爲人傑得君於先帝叶運於昌時纂戎弓裘守土燕薦迨此一紀北方晏然有開必先納款於我沈斷大事奮揚奇謀捧幽都四封之圖挈盧龍三軍之籍盡獻闕下高謝人間感動君臣驚激忠義顧妻子若脫屣視富貴如浮雲惟道是從奉身以退仲連事成而蹈滄海子房名遂而追赤松賢明所歸今

古一致朕方改授兵柄移鎮鄆郊命作司徒倚爲左相期奮乃志將沃朕心而天不憇遺邦失柱石夫臣戴君如元首則君視臣如股肱股肱或虧何痛如是茲朕所以廢朝軫念備禮加恩庸建爾於上公蓋褒贈之崇重者也嗚呼爾總尚知之乎今遣使某官某副使某官某持節冊贈爾爲太尉

爲宰相賀赦表

臣某等言伏奉今日制書大赦天下者臣與百執事奉揚宣布與億兆眾蹈舞歡呼自天降和率土同慶臣等誠歡

誠忭頓首頓首伏惟皇帝陛下出震御極建元發號大明  
升而六合曉一氣薰而萬物春肆眚措刑滌瑕蕩穢凡在  
黔首納於歡心矧又祇祀天地孝享宗廟蠲減租賦策徵  
賢良褒德及先賞功延嗣敬賓養老念舊睦親生人之積  
弊盡除有國之頽綱必舉况陛下承二百祀鴻業之重纂  
十一聖耿光之初始奉嚴禋新開寶厯天下之目專專然  
觀陛下之動天下之耳禺禺然聽陛下之言斯則陛下出  
一言不終日必達於朝野舉一事不浹辰必聞於華夷當  
疲人求安思理之秋是陛下敬始慎微之日苟行一善則

可以動人聽而式歌舞况具眾美信足以感人心而致和平康哉可期天下幸甚臣等謬居重位幸屬鴻休慙竊股肱喜深骨髓歡忻悚躍倍萬常情無任鼓舞慶幸之至

爲宰相請上尊號第二表

臣某等言今月二十四日臣等已陳表章請上尊號愚誠雖懇聖鑒未迴躋地跼天不勝大願臣等誠惶誠恐頓首頓首臣聞大道者無求於物物尊而不辭至公者非欲其名名生而不讓不讓故與天合德不辭故率土歸心斯所謂應乎天而順乎人者也伏惟皇帝陛下嗣興一德統牧

萬方致時俗之和平納生靈於富一作福壽金革已偃銷七

福

十載之厲階玉燭方調啟一千年之聖運天人合應書軌

混同而鴻名未加盛典猶缺華夷失望史冊無光此誠君

上之謙然亦臣下之罪也今臣所以上稽天意下酌人情

再贊皇明重陳丹愾臣謹按書曰思曰睿睿作聖又曰乃

聖乃神乃武乃文經曰明王以孝治天下凡此五者厯觀

列辟雖甚盛德莫能兼之伏以陛下自卽大位及茲二年

無巾車汗馬之勞而坐平鎮冀無亡弓遺鏃之費而立定

幽燕仁和一薰蕕驚盡化可不謂睿文乎削平天下震耀

八荒北虜求婚以稟命西戎乞盟而納款威靈四及奔走  
來賓可不謂神武乎陛下以萬乘之尊四海之富供養長  
樂道光化成推而致之可塞天地可不謂孝德乎故臣等  
敢冒死稽首上尊號曰睿文神武孝德皇帝伏惟陛下畧  
撫謙之小節宏祖宗之大猷惟十一一作二聖在天豈忘繼  
其志以億兆人爲子寧忍阻其心特迴宸衷俯受徽號在  
元穹不爲主宰於盛德有所形容煥乎大哉垂裕無極此  
實天下之幸甚非獨臣之幸也臣等無任誠願懇禱之至

爲宰相讓官表

臣某言伏奉今日制書授臣某官同中書門下平章事者  
寵擢非次憂惶失圖踰地跼天不知所措臣某誠兢誠惕  
頓首頓首臣聞上理陰陽下平法度外撫夷狄內親黎元  
使百官各修其職一物不失其所此宰相之任也臣有何  
功德有何才能越次超倫忽承此命下乖人望上紊朝經  
致寇速尤無甚於此臣謬因文學忝列班行先朝乏人擢  
居內職星霜屢改爵秩驟加未逾十年忽登相位名浮於  
實任過其才豈唯覆餗是憂實累知人之鑒况陛下肇開  
厯數將致升平輔弼之臣尤宜慎擇臣粗知古今敢言本

末樞衡要地初不得人則理化勞心終無成日此所以重  
陳手疏再憑血誠乞迴此官別授能者臣若得請便不負  
恩情見於辭非敢飾讓皇天白日實鑒臣心無任懇款屏  
營之至謹奉表陳讓以聞

賀平淄青表

臣某言伏見二月二十二日制書逆賊李師道已就梟戮  
者皇靈有截睿算無遺妖氛廓清遐邇慶幸臣某誠歡誠  
喜頓首頓首臣聞亂常千紀天殛神誅李師道包藏禍心  
暴露逆節罪盈惡稔眾叛親離未勞師徒自取擒戮伏惟

睿聖文武皇帝陛下文經天地武定華夷凡是猖狂無不  
誅剪兩河清晏四海會同昇平之風實自此始臣名參共  
理職忝分憂忭舞歡呼倍萬常品守官有限不獲稱慶闢  
庭無任慶快踴躍之至謹具奏聞謹奏

賀上尊號後大赦天下表

臣某言伏奉七月十三日制書大赦天下跪捧宣布舞蹈  
歡呼自天降休率土同慶中謝臣聞元功盛德非鴻名不  
能形容物厲人疵非皇澤不能滌蕩自非上聖莫能兼之  
伏惟元和聖文神武法天應道皇帝陛下纂承大業子育

羣生信及豚魚威殲梟獍削平寰海混一車書億兆一心  
願崇大號從人欲而俯膺盛禮賜時和而廣洽皇恩蠲減  
賦租收拔淹滯命黜陟而別能否開諫議而策賢良宿弊  
必除舊章咸舉帝王能事盡集於今凡在生靈孰不幸甚  
臣謬當委擢職在頒條牘躍之誠倍萬常品限以守官不  
獲稱慶闢庭無任慶忭之至

爲宰相賀雨表

臣某言臣聞聖明在上刑政叶中則天地氣和風雨時若  
常聞其語今見其時臣某等誠歡誠躍頓首頓首臣伏以

陰陽氣數盈縮相隨去秋多霖今春少雨宿麥猶茂農功  
未妨陛下念物憂人先時戒事靡神不舉有感必通故雲  
出於山月離于畢初灑塵以震霖漸破塊而霧霓圃圃田  
疇無不霑足雨之所致臣知其由自上而來雖因天降從  
中而得實與心期發於若厲之誠散作如膏之澤凡在率  
土孰不歡心臣等位忝鈞衡職乖燮理仰陰陽而增懼顧  
霖雨而懷慙無任兢惕之至

爲宰相賀殺賊表

臣某等言伏承某道逆賊某乙某月某日已被某殺戮訖

皇靈震耀克孽梟夷率土普天歡呼鼓舞臣等誠喜誠忭  
頓首頓首臣聞亂臣賊子阻兵干紀者明則有天討幽則  
有鬼誅遲速之間罔不殲殄伏惟文武孝皇帝陛下君臨  
八表子育羣生合天覆地載之德順春生秋殺之令宿寇  
遺孽閭然銷亡四海九州廓然清晏逆賊某乙一介賊隸  
兩河叛人包藏禍心竊弄凶器戕害主帥虔劉善良幕燕  
鼎魚偷活頃刻顛木之餘枿瘞疽之遺種斧斬欲加而先  
折鍼石未攻而自潰不有弔伐孰知德威不有妖氛孰知  
神算則天下之心有以知順存逆亡其猶影響者也臣伏

以某乙旣已斬首某乙將何保身若不乞降卽應生變輔之或在車則相依皮旣不存毛將安附况我乘破竹彼繼覆車止戈之期翹足可待無任喜慶忭躍之至

賀雲生不見日蝕表

臣某等謹言臣聞堯湯之逢水旱陰陽定數也宋景之感熒惑天人相應也蓋天地大統不能無災皇王至誠可以銷慝嘗聞此說今偶其時臣等誠欣誠幸頓首頓首伏見司天臺奏今月一日太陽虧者陛下舉舊章下明詔避正殿降常服禮行於己心禱於天天且不違物寧無應況正

陽月朔亭午時中和氣周流密雲布濩蒙然暫蔽赫矣復明屏翳朝濟但驚若煙之涌曜靈晝掩不見如月之初所謂誠至於中而感通於上也臣等敢不再陳事理重考禎祥三光忌盈必有時蝕萬物莫覩與無災同慶生交感之間喜浹照臨之內雖卿雲五色瑞景再中除沴致祥曾何足比百辟伏賀萬人仰觀事彰天鑒孔明道配日新其德臣等幸遭昌運謬荷殊私皆乏濟時之才同居待罪之地日月薄蝕自慙燮理無功山川出雲實賴聖明有感感賀欣戴倍萬常情無任忭躍竦踴之至

爲崔相陳情表

臣植言臣有情事久未敢言今輒陳露伏增戰灼臣亡父某官亡妣某氏是臣本生亡伯某官某贈某官臣今承後建中初德宗皇帝念臣亡伯位高無後以猶子之義命臣繼紹仍賜臣名嗣襲雖移孝思則在上荷君命永承繼絕之宗中奪私恩遂阻劬勞之報歲月曠久情禮莫伸自去年已來累有慶澤凡在朝列再蒙追榮或有陳乞皆許迴授况臣猥當寵擢謬陟台階爵祿之榮實有踰於同輩顯揚之命獨未及於先人飲泣茹悲哀慙兩極臣今請以在

身官秩并前後合敍勲封特乞聖慈迴充追贈倘允所請  
無幸於斯則臣烏鳥之心猶再生而展養犬馬之力誓萬  
死以酬恩蹕地仰天不勝感咽披陳誠懇煩黷宸嚴無任  
惶懼激切之至謹奉表陳露以聞

忠州刺史謝上表

臣某言臣以去年十二月二十日伏奉勅旨授臣忠州刺  
史以今月二十八日到本州當日上任訖殊恩特獎非次  
遷榮感戴驚惶隕越無地臣某誠喜誠懼頓首頓首臣性  
本疎愚識惟褊狹早蒙採錄擢在翰林僅歷五年每知塵

恭竟無一事上答聖明及移秩宮寮卑冗疎賤不能周慎  
自取悔尤猶蒙聖慈曲賜容貸尚加祿食出佐潯陽一志  
憂惶四年循省晝夜寢食未嘗苟安負霜枯葵雖思向日  
委風黃葉敢望霑春豈意天慈忽加詔命特從佐郡寵授  
專城喜極魂驚感深泣下方今淮蔡底定兩河乂寧臣得  
爲昇平之人遭遇已極况居符竹之寄榮幸實多誓當負  
刺慎身履冰勵節下安凋瘵上副憂勤未死之間期展微  
効跼身地遠仰首天高蠻蟻之誠伏希憐察無任感激懇  
款彷徨之至謹遣某官某乙奉表陳謝以聞臣某誠惶誠

恐頓首頓首謹言

杭州刺史謝上表

臣某言去年七月十四日蒙恩除授杭州刺史屬汴路未通取襄陽路赴任水陸七千餘里晝夜奔馳今月一日到本州當日上任訖上分憂寄內省庸虛仰天感一作戴思跼

地失次臣某中謝臣謬因文學忝廁班行自先朝黜官以來六年放棄逢陛下嗣位之後數月徵還生歸帝京寵在郎署不踰年擢知制誥未周歲正授舍人出泥登霄從骨生肉唯有一死擬將報恩旋屬方隅不寧朝廷多事當陛

下旰食宵衣之日是微臣輸肝寫膽之時雖進獻愚衷或  
期有補而退思事理多不合宜臣猶自知况在天鑒忝非  
土木如履冰泉合當鼎鑊之誅尚忝藩宣之寄才小官重  
恩深責輕欲答生成未知死所唯當夙興夕惕焦思苦心  
恭守詔條勤恤人庶下蘇凋瘵上副憂勤萬分之恩莫酬  
一二仰天舉首望闕馳心葵藿之志徒傾螻蟻之誠難達  
無任感恩激切之至謹奉表稱謝以聞

爲宰相謝官表

臣某言伏奉今月日制書授臣守本官同中書門下平章

事者殊常之命非望之恩出自宸衷加於凡陋竦駭震越  
不知所爲中謝臣伏准近例宰相上後合獻表陳謝臣今  
所獻與眾不同伏惟聖慈特賜畱聽臣伏聞元宗卽位之  
初命姚元崇爲宰相元崇欲救時弊獻事十條未得請間  
不立相位元宗明聖盡許行之遂致太平實由於此陛下  
視今日天下何如開元天下微臣自知才用亦遠不及元  
崇若又僥倖安懷因循保位不惟恩德自負實亦軍國可  
憂臣欲候坐對時便陳當今切事下採時弊上酬君恩臣  
之誓心爲日久矣陛下許行則進不許則退進退之分斷

之不疑敢於事前先此陳啟况臣才本庸淺遭遇盛朝天  
心自知不因人進擢居禁署訪以密謀恩獎太深謾謗竝  
至雖內省行事無所愧心然上黷宸聽合當死責豈意憐  
察曲賜安全蜩蟻之生得自茲日今越流輩授以台衡拔  
於萬死之中致在九霄之上捫心撫已審分量恩陛下猶  
不以眾人之心待臣臣豈敢以眾人之心事上皇天白日  
實鑒臣心得獻前言雖死無恨無任感恩懇款之至謹奉  
表陳謝以聞臣某誠惶誠恐頓首頓首謹言

蘇州刺史謝上表

臣居易言伏奉三月四日恩制授臣使持節蘇州諸軍事  
守蘇州刺史臣以某月二十九日發東都今月五日到州  
當日上任訖時當明盛寵在藩條祗命荷恩以感以懼臣  
某誠歡誠幸頓首頓首伏惟皇帝陛下嗣膺厯數重造寰  
區將致昇平在先政化詢求牧守勤卹黎元實陛下慎選  
惟良之秋責成共理之日也臣以微陋早忝班行前自中  
書舍人出爲杭州刺史幸免敗闕實無政能已蒙寵榮入  
改宮相今奉恩寄又分郡符獎飾具載於詔中慶幸實生  
於望外况當今國用多出江南江南諸州蘇最爲大兵數

不少稅額至多土雖沃而尚勞人徒庶而未富宜擇循良  
之吏委以撫綏豈臣瑣劣之才合當任使然旣奉成命敢  
不誓心必擬夕惕夙興焦心苦節唯詔條是守唯人瘼是  
求諭陛下憂勤之心布陛下慈和之澤則亭育之下疲人  
自當感恩而歲時之間微臣或希報政塵瀆皇鑒吐露赤  
誠寵至空驚恩深未答無任慙惶懇激之至謹差軍事散  
將某乙奉表陳謝以聞臣某誠惶誠恐頓首頓首謹言

元和南省請上尊號表

臣聞皇階肇興必本其丕烈明號允屬將御其成功所以

開天地命厯之符合人靈慶感之運臣等輒敢上稽天鑒  
下采人謠以今月十九日瀝懇陳辭冀孚睿聽九重尊祕  
萬有禹禹誠如動天心如履薄臣等誠惶誠恐頓首頓首  
伏惟睿聖文武皇帝陛下一德繼統上符十天六龍時乘  
下壓羣嶽張寶圖以光帝載懸玉鏡以澈襟靈休明會朝  
則百神冥衛清淨子物而萬邦式孚今夫陰本於刑陽稱  
其德以刑而右武以德而尚文蓋將導人君無爲之初官  
天道有成之始今陛下宣威紀功示人以武也業古垂統  
示人以文也纂炎唐十一之盛陋宗周八百之期序庶徵

於域中惟賜履於闐外宇宙至廣每驚符瑞之繁動植殊  
輕奚答生成之造昔之述夏禹美宣王雖外軼其聲而中  
未盡善孰若陛下慮及一物精入萬樞發揮盛祉啟迪鴻  
業自彼元和至於茲歲掃羣妖清巨祲率黎崇之不恪刻  
節持之方圓或身暴都市或首懸藁街天英神斷不疾而  
速雖堯伏四罪殷征三年揆之於今彼有慙德固當仰應  
名實丕隲鴻徽闢乾位於象帝之文飾宸耀於稟氣之類  
豈可抱沖謙之微事曠祖宗之大猷臣等不勝由衷大願  
願上尊號曰元和聖文神武法天應道皇帝伏願納天人

之貺采臣庶之誠昭示至公允塞羣議無任惄迫懼懼之至

第三表

臣聞古先哲王垂衣御極何嘗不取鑒祖則作爲盛猷伏觀列聖以來必崇明號旣以表域中之大亦以示天下之公苟或沖讓未行撫謙不發則無以焜煌前烈威畧外區臣等所以披誠上陳冀垂明聽墨詔批答天心尚違臣庶禹禹不知所措臣等誠惶誠恐頓首頓首伏聞開元天寶之盛也典章大備劍戟已銷表德顯功累上尊稱蓋天人

之符契不得已而從之陛下稟上聖之姿造中興之運踐  
臨土宇虔奉宗祧恢復兩河廓清四海象天爲大竝日之  
中丕業巍乎已成鴻名鬱而未稱臣等所以采前古之議  
酌當今之詮敢悅懌於天顏冀光昭乎史冊百辟卿士皆  
以爲宜萬方黎元固不可忽陛下損之於其成之代棄之  
於太寧之時尚以河湟未收關隴設備而欲更施利澤方  
啟舊章執謙德而彌仰崇高議神功而無以彰灼億兆延  
頸靈祇顧懷率土之人皆知不可况天地之意祖宗之靈  
乎臣等命偶昌期職叨樞近雖微誠不足以上感而懇願

終冀於必從伏乞深惟訓謨特降宸慮允華夷之至望回  
日月之殊輝誕受鴻名光膺大慶紹五帝三皇之絕典光  
九廟萬國之丕休人神交感孰不爲允無任懇款兢惶之  
至

第四表

臣聞仰稽舊章虔上尊號懇誠三濶沖旨未回朝野禺然  
罔知攸措臣等誠惶誠恐頓首頓首臣聞帝王御極作人  
司牧德盛者爰加顯號功高者必建鴻名是用叶天地之  
符塞人祇之望榮非爲已義實徇公爰在累聖必從眾欲

矧陛下踐寶祚握瑤圖懸日月而照九圍鼓雷霆而清八  
極故得吳蜀電滅齊蔡砥平撾祖宗之宿憤救黎元於焚  
溺今者威加四海澤浸八荒文軌罔不同華夷罔不服政  
刑罔不舉符瑞罔不臻闢再造之宏規致中興之昌運而  
典冊猶鬱徽號未崇何以副萬國之心何以答三靈之祝  
臣等謬居樞近累黷宸嚴望九重之俯從爲千載之榮遇  
雖則祈天之奏伏蒲而未感所冀回日之誠傾藿而必遂  
臣等不勝懇款屏營之至

論請不用奸臣表

臣某言臣聞主聖臣忠聖主旣明臣輒獻至忠之誠上明國之典下去邪之疑伏望陛下納臣之諫則海隅蒼生兵屯咸偃無大臣之諫則國必敗有大臣之諫則國必安非疑元稹之愆其事有實亦不虛矣矯詐亂邪實元稹之過朝廷俱惡卿士同冤裴度論議之謀陛下已令獎度之勲不允所請理已爲乖今陛下含忍不爲竄逐處之臺司同議國典天下人心無不惶戰何執元稹之言居度散司之職且同議裴度今功業今代一人卿侯士庶無不同惜今天下欽度者多奉稹者少陛下不念其功何忍信其奸臣

之論况裴度有平蔡之功元稹有器軒之過東都留守誠卽清閒人勞之功不合居於散地伏望陛下聖恩照明竝無矯言伏乞追裴度別議寵榮臣素與元稹至交不欲發明伏以大臣沈屈不利於國方斷往日之交以存國章之政臣等職當諫列不敢不奏謹奉表以聞無任兢迫戰切之極瞻望廻恩天下同慶謹案文苑英華註云元白交分此論列集固無之光謂君直友逆則順君以誅友古有行之者則此奏亦不爲過但白非其人也與元稹二表俱非是當以唐

書爲正

諫詔吐突承璀率師出討王承宗疏

唐家制度每征伐專委將帥責成功比年始以中人爲都監韓全義討淮西賈良國監之高崇文討蜀劉貞亮監之且興天下兵未有以中人專統領者神策旣不置行營節度旣承瓘爲制將又充諸軍招討處置使是實都統恐四方聞之必輕朝廷後世且傳中人爲制將自陛下始陛下忍受此名哉且劉濟等洎諸將必恥受承瓘節制心有不樂無以立功此乃資承宗之姦挫諸將之銳

再言承瓘疏

陛下討伐本委承瓘外則盧從史范希朝張茂昭今承瓘

進不決戰已喪大將希朝茂昭數月乃入賊境觀其勢似  
陰相爲計空得一縣卽堅壁不進理無成功不亟罷之且  
有四害以府帑金帛齊民膏血助河北諸侯使益富強一  
也河北諸將聞吳少陽受命將請洗滌承宗章一再上無  
不許則河北合從其勢益固與奪恩信不出朝廷二也今  
暑濕暴露兵氣薰蒸雖不顧死孰甚其苦又神策離募市  
人不狃於役脫奔逃相動諸軍必搖三也回鶻吐蕃常有  
游偵聞討承宗厯三時無功則兵之彊弱費之多少彼一  
知之乘虛入寇渠能救首尾哉兵連事生何故蔑有四也

事至而罷則損威失柄祇可逆防不可追悔

河朔復亂合諸道兵討無功賊取弓高絕糧道深

州圍益急因上言

兵多則難用將眾則不宜詔魏博澤潞定滄四節度令各守境以省度支貲餉每道各出銳兵三千使李光顏將光顏故有鳳翔徐滑河陽陳許軍無慮四萬可徑薄賊開弓高糧路合下博解深州之圍與牛元翼合還裴度招討使使悉太原兵西壓境見利乘隙夾攻之閒令招諭以安其心未及誅夷必自生變且光顏久將有威名度爲人忠

勇可當一面無若二人者